

ALL NATIONS GOSPEL PUBLISHERS



www.angp-hb.co.za



info@angp.co.za

Ekegusii — "The Heart of Man"

ENKORO YA MWANYABANTO

Copyright ANGP

**ALL NATIONS GOSPEL PUBLISHERS
P.O. BOX 2191, PRETORIA, 0001 R.S.A.**

(A Gospel Literature Mission financed by donations)

Copyright ANGP

ISBN 0 908367 72 4

ENKORO YA MWANYABANTO

Enyomba ya Nyasae gose negetii gia Saitani.
1 Yohana 3:4-10.

Ase Abasomi:-

Egetaabu ekeiga tikeri ekeyia. Igo kiarorekanete ritang'ani ase ense ya Faransa korwa engaki ang'e koetania emiaka amagana abere. Kiareeteire abanto chiribu chinyinge oborabu na ogosesenigwa okonene. Kiabeire buna ekerore gi'enkoru ase abasaacha na abakungu bakonyaara kwerorera chingencho chie chinkoro chiabo buna Nyasae agochirora. Abange barorire chinkoro chiabo nchire na ebibe, na ase igo baorokirie ebibe biabo na konyoora chinkoro chinyia na obogima oboyia ime.

Ekeru ogosoma egetaabu eke, koraanche oinyore ng'a ekio nekerore gi'enkoru aase oraanyare gosoma na kwerigereria. Onye aye noyomo otegeneti, gose Omokristo, gose oyoiranire nyuma, nonyaare korora ekieni kiao buna Nyasae agokerora. Koebereria konde tikoiyo ase Nyasae. Igo akorigereria enkoru y'omonto, tari ase obosio gose ekieni kie risankwa.

Saitani nere ise bw'abanyaborimo bonsi, naende nere omonene bw'omosunte naende nere enyasae y'ense eyeiga. Igo akweonchora koba omoreng'anio buna omomalaika bw'oborabu. Korende bono ere tari omomalaika koreng'ana buna abanto abange banchete komoreng'ania. Abwo igo bakogeechigwa na emegwekano ekworokia maiso marore buna Saitani are. Koreng'ana buna yareng'e agwo amatuko a kare, naboigo, mbareo abatomwa h'oborimo, bago-kora emeremo y'oborimo, bakweonchora na kwereing'ania na abatomwa ba Kristo. Korende tari ogokumia ekiaagera Saitani omonyene igo akweonchora abe buna omomalaika bw'oborabu. II Abakorintho 11:13,14. Saitani igo akoribia amaiso y'abanto na ebirengererio, erio tibanyaara korora obwanchani bwa Nyasae, gose obonene gose ogosika kwa Nyasae, gose tibakonyaara komorora Omo-

booria obo Yeso Kristo. II Abakorintho 4:4. Abanto b'ense eyeiga bamiamigwe na enyasae y'ense eye, tibakonyaara korora ng'a igo bakogenda bwango ne chinguru gochia ase obosiru bwa kare na kare na gochia ase ekebemberi ki'omorerero o kare na kare ogwoka na ekemore ekenene. Babeire buna abakuure chinkoro ime ase Nyasae, bakogamberwá na omoika bw'enyasae y'ense eyeiga. Abafeso 2:2.

Ase engencho eyeiga Omwana O Nyasae agachandwa erio achibune chingencho chia Saitani. I Yohana 3:8. Ase igo moigwere Nyasae. Mwange Saitani, na ere nabatame. Moike ang'e Nyasae, na ere nabaike ang'e inwe. Yakobo 4:7,8.

Ekeru ogosoma egetaabu eke na korigereria emegwekano eye, nonyaare korigereria ime y'enkoru yao. Karue ribaga ase enkoru yao ekenonorwe erio erorwe buna ere. Onye gokorora ng'a enkoru yao nembe, ere na ebibe, tobaisa korikaana ring'ana erio, gose toribisa, korende orianche na kobiorokia ebibe biao. Onye togoteeba ng'a titori na ebibe, igo tokweng'aina abanyene, nonya noboene tibori ime yaito. Gatoraabiorokie ebibe biaito, Nyasae nomwege-nwa na omonyakeene natosibie ebibe biaito, na gotosibia obobe bwonsi. Toise goteeba ng'a titokoreti ebibe, igo tokomokora Ere koba omorimo nonya nering'ana riaye tiriri ime yaito. I Yoh. 1:8-10. Ase igo ekanye inse ase amaboko a Nyasae, erio abaabere ebibe biaino na kobasibia ase amanyinga a Yeso Kristo.

Aye Nyasae ogokogambera gose Saitani. Aye nomosomba bw'ebibe ore gose nomokori emeremo o Nyasae ore. Onye ebibe bigokogambera ase obogima bwao, tobaisa korikaana ring'ana erio. Orere ase Nyasae, oyoraanyaare kogokora omosibore ase Yeso Kristo oyochete ime y'ense abatoorie abanyene ebibe, abaramokie emeuko amaiso, aturuusie intwe omosunte ime, na omosunte orwe ase tore. Nigo achete atoreete ase oborabu bwaye bw'ogokumia. Yeso nigo achete atokore abasibore korwa ase chinguru chi'ebibe ne chia Saitani. Ase Yeso ntore na ogotooreka korwa ase ebibe biaito. Noteneine ase obosio bwa Nyasae Omochenu okorora na komanya obobisi bwao bwonsi na ogokora kobisekanete na kera ebirengererio boigo. Tokonyaara kwebisa, gose ogokora kwao korwa ase obosio bwa

Nyasae. Oyobeegete ogoto aase aye, taigwa? Oyorikorete eriso, takorora? Amateera (Zaburi) 94:9. Ekiaagera amaiso aye igo are igoro ase chinchera chi'omonto, na ere igo agochirora chingendo chiaye chionsi. Tari aase 'obomwamu, gose aase 'omosunte bwoka, baraanyaare kwebisa abagokora obobe. Ayubu 34:21-22. Ekiaagera amaiso 'Omone ne igo akoetanana ense yonsi, erio eorokie koba omonguru ase engencho y'abwo, bare na enkoro y'ekeene gocha ase are. II Chingaki 16:9. Yohana 2:24.

Nare na ogosesenigwa oyobwabeire ebibe, na kobiserwa amamocho aye. Osesenigwe oyo Nyasae atabarereti obobe, oyo enkoro yaye ime borimo botaiyo. Amateera 32:1-5. (Boigo osome Amateera 51) Yeso nkonakorangeria are nonya ndeero. Inchuo ase nde, inwe mwensi abamochandegete na abamwabunekire ne chigurube chindito, na inche nimbatimokie. Mathayo 11:28-30.

OMOGWEKANO BWE RITANG'ANI

Omogwekano oyoiga igo okoorokia enkoro y'omonto otegeneti na omonyene ebibe, naende ey'omosaacha gose omokungu bw'ense okogamberwa na omoika bw'ense eye na okogania ne chinguru chi'omobere. Omogwekano oyo nekerore ki'oboene gi'enkoro yaye buna Nyasae akomorora. Obobariri bw'amaiso aye igo bokworokia obotindi bwaye. Osome Emereng'anio 23:29-32. Ning'o okoaaka egeturi? Ning'o ore na amaiso amabariri? Mbaria bagoikaransererera ebinyenga, bagochia kogaserera edivai eburukaine. Tobaisa korigereria ekenyenga kiabeire ekebariri, ekeru ogokebeeka ekemunu kogegokerora ekieni kiaye na kogegokenonoka-ng'ora ng'ora. Omoerio oye igo gekoroma buna eng'iti kiarasa buna rirubi. Amaiso ao narore amang'ana amageni, na enkoro yao neruusie amabe.

Inse y'omotwe nonyaare korora enkoro y'omonto eyere oboikaranso bwe ching'iti ao ao chikworokia ebibe ebinge ao ao bire ime y'enkoro y'omonto. Enkoro negeikaranso ki'ebibe biaito. Nyasae igo agoteeba, Enkoro igo eko ba endimo kobua ebinto bionsi, ning'o oraanyare koyemanya? Yeria 17:9. Yeso omonyene agateeba iga: Ekiaagera ime, ase emioyo y'abanto, igo akorwa amarengererierio amabe, na obonyaka bwonsi, oboibi, oboiti, obotomani, okorengereria okobe, obobe, okong'ainereria, okogania

ENKORO Y'OMONYABIBE



okobe, okomogorera, okorama, oboenenu, obokayayu: aya onsi amabe igo akorwa ime, naro akamobeeka omonto riko. Mariko 7:21-23.

ONCHIMBO:

Egetongwa ki'eritang'ani nenyoni ekorokwa Onchimbo. Enyoni eyio engiya mono ere na amarionya ateranetie eb'eni bi'ogokumia, aiga yareng'anigwe na ebibe bi'obwerori. Eng'enang'eni ya Mambia (Makerubi, enge-

ncho yaye, omomalaika), oyoakire amaguta, oyorenge na oborabu ase Nyasae naende omomalaika o Nyasae, akagwa ase engencho y'obwerori, akaba omobisa o Nyasae, Saitani. Isaya 14:9-17. Ezekieli 28:12-17. Agwo omochaakano Saitani tarenge Omomalaika bw'Omosunte.

Obwerori nigo bokweorokia ase chinchera chinyinge. Abanto abange igo bakwerora ase obotenenku, naende ase eniibo yabo ye chiombe, ching'ondi, chinyomba na emegondo, naende ase chingobo chie rigori rinene, naende ase ekieni ki'obosio ekiya, na omobere okweorokia ase obosoku. Abanto bande, batiokeire igoro na obwerori ase engencho y'ebisaku biabo, na ase ekerengo gie chisemi chiabo, na ase chinguru chi'omobere na ogokora okonene gw'ense eye, ekieni kie risankwa amo na ebinto ebinge bitagwenereti. Abande igo bagoteema gwekora abaya ase okobeeka chibangiri, chibeta chi'amato, ogwesaraga na gwekora chiserebe, nonya Nyasae obatongerete emebere emegima. Nyasae igo abangete abeerori, korende igo akobasesenia aboororo. 1 Petero 5:5. Nyasae nigo agechete oboenenu na obwerori. Emereng'anio 8:13. Obwerori igo bokobotang'ana obosiru, na enkoro embe yatang'ana okogwa. Emereng'anio 16:18.

ESESE:

Esese igo ekworokia okogania kw'omobere, na obobe, na obotomani, na ogosaria. Kera aase ekogenda, esese igo egwesoyia eubi ime. Abanto abange babeire boigo. Kera aase bakogenda, abanto abwo igo bagochaaka kobaebereria na kobachanchima abande, omokungu ase omosaacha na abande abange boigo. Obotomani na ogosaria biabuchire bobo mono ase amatuko aya 'omoerio na obobe. Abanto abake (abasae) abange tibari konyaara gwetanga, nonya nabasaacha banyuomete nonya nabakungu. Nonya nabagomba abange nabo bare ime y'ogosaria. Ebibe bia Sodomu boigo biambokeire obogima bw'abanto chiribu chinyinge, nonya nase ogoikerania amang'ana a Yeso, aya abanete ng'a ang'e na amatuko 'omoerio igo araabe buna aya Sodomu na Gomora. Abaragoori na Abagere amo na ebisaku binde igo bakomoroka omotomani "Esese". Abanto buna abwo tibakonyaara korora oboruoti bwa Nyasae ekiaagera isiko ne chisese, na aba-

rogi, na abasaria, na abaiti, na barabwo abagosasima emegwekano, na onde bwensi bwanchete oborimo na kobokwana. Okomañoka 22:15. Ase engencho eyio gotame ogosaria. Kera ekebe agokora mwanabanto nisiko y'omobere oye, otatiga ere oyogokora ogosaria ogwekorera ebibe ase omobere oye bweka omonyene. Timomanyeti ng'a inwe mwabeire enyomba ya Nyasae? Onye omonto ogosaria enyomba ya Nyasae, nero omobere oye, Nyasae nigo araa-mosarie omonto oyio, ekiaagera enyomba ya Nyasae nenchenu, nero nero inwe. 1 Abakorintho 3:16-18; 6:15-20.

ENGURUE (EMBECHÉ):

Engurue igo ekworokia ogotinda na okoria bobekw'endaagera. Engurue igo ekoria kende gionsi ekoumera. Teri gochoora egati y'ekiya na ekebe, naboigo abanto abange igo bakoria chinyama chi'ebinto bikwete ase amarwaire gose ching'entire. Abwo igo bakoria amanyinga, ne chimbeba na amanyo, ebi Nyasae ateebete ng'a tetogwenereti tobirie. Ogokora 15:20; Isaya 66:17. Ase igoro yayio bekoreire obobe emebere yabo, eyere enyomba ya Nyasae, ase ogotakuna, gose okong'usera etumbato chimiooro, gose okonywa chisigara. Amang'ana ayio igo akobeeka ogosaria, na kobeeka obosongo ime y'amanyinga abo naende igo akobaraa gochia ase okwenaria kw'ebibe. Saitani igo akobasiba ase okogania gw'okonywa esigara, korende nase chinguru chia Nyasae chioka, ng'a omosaa-cha gose omokungu nabo araanyaare koba na obosibore korwa ase okwenaria okoiga okobe. Abanto abake gose abagotu, igo bakorengereria ng'a tari gento gotinda ase ributia, gose ase amarwa, gose ase ekenyenga. Korende, omonywa onde bwensi takonyaara koboira oboruoti bwa Nyasae. Amarwa tari endaagera, korende negetindo ki'amakweri kegoichania na koonchora ebirengererio. Baria bakoyanywa amarwa igo bagokora buna abariri na abatomani, nonya nogoitana. Onye batanywa amarwa nanga tibakora bo. Ekenyenga igo kegochecheria, ogotinda kwa-reeta esegi, na oyogokora okomocha ase ebinto ebio tari na obong'aini. Emereng'anio 20:1. Inse y'amachiiko a Musa, onde bwensi orange na omwana omomochi ogotinda, igo yarengé ng'a yamogweneire omwana oyio aakwe amagena, na akwe. Okoinyoria kw'Amachiiko 21:19-21. Baria

bakwenga ebiroro gose amarwa, babeire abamochi buna baria bakoyaoonia gose bakoyanywa, ekiaagera Ring'ana ria Nyasae igo rigoteeba: obobe nobwabo abare abakong'u konywa ebiroro ne chinguru, abanto abasaacha bare ne chinguru bakoburukania ebiroro. Isaya 5:22. Obobe nobwaye ere oyokomoa omogisangio oye ebiroro, aye oko-beeka obosongo bwao, na komotindia boigo. Habakuku 2:15. Timong'aineka: Abasaria tibakonyoora oboruoti bwa Nyasae, nonya nabasasimi emegwekano, nonya nabakori bobe, nonya nabatomani, nonya nabamochi, nonya nabakurumi, nonya nabakogania, nonya NABAGOTINDA, nonya nabarami, nonya nabauuri. 1 Abakorintho 6:9, 10.

Ase igo ogokora kw'omobere nokwa maiso marore, nakwo oko, obotomani, eubi, ogosaria, ogokorera emegwekano, oborogi, obobisa, chisegi, obwerori okobea, esugu, obwerusanani, obotongi amang'ana ay'oborimo, obogeechi, OGOTINDA OKORIA BOBE, na ayande ayagwekaine ayio. Barabwo abakoyakora amang'ana ayio, tibakonyoora oboruoti bwa Nyasae. Abagalatia 3:19-21. Naende timotinda ase ebinyenga (amarwa), ase ogosaria kore ime; korende moichorigwe Omoika. Abaefeso 5:18. Yeso ore ensooko y'obogima, obaeire abare na erang'o ribaga eriiga: Omono karaabe na erang'o, tiga achiche ase nde anywe bosa amaache y'obogima. Yohana 7:37, 38. Bono kera oyoigwete erang'o, inchuc ase amaache, nere oyotari na beesa, inchuo, mogore morie; Ee, inchuo, mogore amache 'amatunda na amabeere, chibeesa chitaiyo nonya ng'eeria ende etaiyo. Naseki mokorua chibeesa ase egentu getari endagera, na ebitooki biaino ase egentu getari koigotia? Isaya 55:1, 2.

ENKURU:

Eng'iti eyio engendi ng'ora yagwekanigwe ebibe bi'obwooro, na ogotebana, na oborogi. Ere oyore omwooro igo akogwa ase amateemwa amange. Igo agwanicha koiba kobua ogokora emeremo. Ande ring'ana erio igo rikoreeta nonya nogoita. Obwooro bw'omoika igo bogototanga titogosaba, naende titogosoma Biblia, naende titokogenda ekanisa. Naende igo bogototanga titorigia obuya bwe Ring'ana ria Nyasae, erire na obogima bwa kare na kare. Ogotebana nomoibi bw'engaki, erio kogotang'ana gochia ogosaria. Nyasae ekeru agokwana na aye erio

omoyee enkoru yao reero, erio Saitani ochicha ase obwango na kogoteebia oganye goika ankiyo gose rituko rinde eritanyaaere goika. Ande nabo oraaganye kera rituko, kera omwaka, goika ase mobosokano ogokwa kogoochere na okwe otari na Nyasae, na otari na ogotooreka, na otari na Kristo. Ase igo Nyasae ateeba: Reero komoraaigwe eriogi riaye, timokong'ia chinkoro chiaino: Abaibirania 3:7,8.

Risabo rikong'u ri'enkuru igo riakoreretwe emeremo na omonyamosiira ara aange na ase igo riagwekanigwe na ebibe bi'okwegena obonyamosiira na ogokora oborogi ribaga ri'okomwegena Nyasae ore moyo. Ribaga ri'okomorangeria Nyasae ore moyo ase ebiro bi'amarwaire na emechando, abanto bayiancha emegwekano, na emeri, na amagena, na amagunchara, gose ebinto binde bikweete ebianchirwe na omonyamosiira. Yamogweneire komwegena Omotongi obo na Omobooria. Nyasae igo abachiigete abaana ba Israeli agateeba: Tomotiga omokungu omorogi abe moyo. Okong'aanya 22:18. Tarorekana egati gati yaino omonto okorigereria chinche chi'oboragori, gose monto okorigereria chingaki chimbe, gose oyokoragora, gose omoriori. Ekiaagera oyokoyakora ayio nokogeechia ase Omonene. Okoinyoria kw'Amachiiko 18:10-12. Timobachiera abare na ebireecha, gose abarogi, timobarigia; erio kobeekwa obobe na barabwo; Inche ninche Omonene Nyasae oino. Amang'ana 'Abalawi 19:31. Na ere oyokobachiera abanyabireecha, na abarogi, erio gokora amabe amo na barabwo, nimbeeke obosio bwane korigereria omonto oria mono, nimoruusananie korwa ase abanto baye. Esibie bono, mobe abachenu, ekiaagera inche ninche Omonene, Nyasae oino. Amang'ana 'Abalawi 20:6,7. Yeso Kristo nere omogwenia bweka bw'enkoru, na omoika, na omobere, ere oyogotwabera amabe aito onsi na ogotogwenia amarwaire aito onsi. Amateera 103:1-3. Monto o sei no obeire omorwaire? Tiga abarangerie abagaaka b'ekania; na barabwo bamosabere, na, ogosaba koria gw'okwegena nakomokoonye omorwaire oria, na Omonene namomokererie igoro. Onye konyoora okorire ebibe, naaberwe. Orokia ebibe biaino inwe ase inwe na gosaberana, monyaaere kogwenigwa. Yakobo 5:14-16.

Ekeru ogosoma egetaabu eke egeke, Nyasae ngokwana are na aye okogoteebia oorokie ebibe biao, na korua obogima bwao ase Nyasae, korende omoika bw'enkuru ore ime y'enkoro yao yakobeekera embwata monwa: Toba nomoayerero, tibwerua reero, nabo oraanyaare gokora erio ankiu, gose omokubio ogocha, gose omwaka ogocha nogwenere, moteebie omosaacha oo ritang'ani, moboorie mokao gose iso, onywome ritang'ani naende baarokie abaana ritang'ani. Ribaga ri' okoriigwera eriogi ria Nyasae, kwariigwa eriogi ri'oborimo ria Saitani. Ase ogokora boigo, igo ogwekora omokong'u enkoro yao koreng'ana buna risabo rikong'u ri'enkuru.

ECHUI: (ENGO)

Eng'iti eyio nentindi mono naende ere nobobe bw'o-goitera amanyinga. Yagwekanigwe na okobea, na obogeechi, na obotindi, na ebinde ebinge, bire ime y'enkoro y'omonto. Monto onde bwensi ogambeirwe na obogeechi na enkoro y'okobea, nabo araanyaare gokora ogokora okobe, na koragereria, na koraama, nonya nogoita. Ara aange yarorekanire ng'a omonto ekero akonywa amarwa, igo akonywa omoika o Saitani, takonyaara gwetanga. Aboba abange igo bakonywa goika baigota erio banyoore oboremu ase ogokora amabe gose okoruusia egesiomba kiarenge enkoro ime. Ebinyenga biabo nobosongo bwe ching'iti, obotindi bw'eng'iti. Okoinyoria kw'Amachiiko 32:33. Egesiomba negiansu ase enkoro y'ebibe, korende Nyasae nere Omoruusia egesiomba. Yeso nigo ateebete: Banche ababisa baino. Nyasae akaria eira ng'a onye ogotwabera ebibe biaito, na intwe goika tobaabere abatokoreire ebibe.

ENG'ITI:

Egetongwa ekio kiarenge ekiya mono kare, gekabang'aina Adamu na Hawa ase omogondo o Edeni, erio abosarie obosaani bwabo barenge na Nyasae. Saitani akarora ribero ekero arooche buna Nyasae abanchete omosaacha na omokungu be ritang'ani. Naende akarora ribero ekero babeagetwe koba abagambi igoro y'ense ribaga ria Eng'enang'eni ya Mambia, ere oyio Saitani. Ase ribero Saitani akaroberia kobosaria obosaani obuya hwarenge egati ya Nyasae na omonto, na akabua. Ribero erio ri-

amakweri, nao rire ime ase enkoru yao, na obogima bwao, naende igo rigotanga omogooko oo, ekeru abantu bande bagoogete na komenya buya. Nonya na Abakristo bakomokorera Nyasae emeremo, yabagweneire kwerenda ase okorigereria buya, igoro y'omoika bwe ribero o Saitani, nonya Nyasae okomotomera omonto omoao na komosenia gokobua aye omonyene. Ribero igo rikobeeka enkoru yao ebirengererio binde bi'obobe, erio obaroge abande na gosaria omogooko obo, naende kobaita baria okororera ribero. Ribero egati y'omosaacha na mokaye, igo riraasarie enka yabo yonsi. Ribero neritindi buna riera. Ogo-teera Kore Okuya 8:6.

EGIOTO:

Egioto igo gekong'eereeta korwa ase riroba na kia-gwekanigwe na ebibe bi'obong'iti na obwanchi bwe chibeesa na eniibo, ebire omochaakano bw'amabe onsi. 1 Timotheo 6:10 Ebioto gete ase ense ya Kongo, bikarorekana bikoria amage goika bikooreka, bigakwa. Omonto omong'iti tari gwancha gwatanana gose kobaa abataka. Igo agoteema ase binde bionsi, ase oboene gose oborimo, erio asangererie eniibo y'ense eyeraasareke ase ebigwankwa gose obobosu (eubi), naende neibwe na abaibi. Ase igo Yeso igo atoteebetie twebekere eniibo igoro, aase abaibi batabune gose bataibe, ekiaagera aase eniibo yao ere, nao na enkoru yao ere. Mathayo 6:19-21. Akani na egesaku kiaye igo baitetwe ase engencho anchete edhababu ne chibeesa, ne chingobo chie rigori rinene, akaira keria kiaragereretigwe. Yoshua 7. Yuda Isikarioti, omworokigwa o Yeso, agakwa ase engencho anchete chibeesa kobua Yeso. Mathayo 27:3-5.

SAITANI:

Oyio ise bw'abanyaborimo bonsi na ise o baria bakobokora oborimo. Ere nomorendi bwe ching'iti echio chionsi, na ere nomogambi bw'enkofo. Yeso agateeba: Inwe naba iso oino, Saitani, na okogania gw'iso oino nakwo mwanchete gokora. Ere igo arenge omoiti korwa omochaakano: gose tari na oboene ime yaye. Kagokwana oborimo, igo agokwana ayare ayaye omonyene, ekiaagera ere nomonyaborimo, na ise o borobwo.

ENG'ENANG'ENI:

Eng'enang'eni yagwekanigwe na ebirengererio bi'omanya amaya na amabe bire ime y'omonto. Aiga ebirengererio ebi biabeire ebimwamu; bikaba na eubi y'ebibe, na okwenaria kw'amabe, nonya tibikonyaara gokora emeremo yaye buya. 1 Timotheo 4:2.

ERISO:

Eriso ria Nyasae nigo rire ande onsi, naende igo rikorora kende gionsi ekere enkoru ime. Ing'ana tiriri ribisekanete ase amaiso a Nyasae. Ase ayio, igo akoyamanya, naende orora amang'ana onsi a bobisi na amabe 'enkoru. Onye kogokora amang'ana ao amabe ase omosunte obotuko, gose ase rinani, gose ande onsi, Nyasae nabo akorora.

OMOMALAIKA:

Omomalaika ogwekanire ne Ring'ana ria Nyasae. Nyasae nigo agokwana na omonyene ebibe ong'ainegete, rikomoteebia aorokie ebibe biaye na atige oborabu bwa Nyasae bosoe enkoru yaye. Nyasae ngokwana are na aye boigo, aye ogosoma, ase ogosoma egetaabu ekio.

RIRUMA:

Enyoni eyio engiya egotugwa naende etari na mechando, igo ere omogwekano bw'Omoika Omochenu, Omoika bw'ekeene okoenekia ebibe, na oboene, na ogokanerwa. Ase omogwekano oyio, Omoika Omochenu igo ore isiko y'enkoru. Takonyaara goikaransa aase ebibe bikogamba.

CHINSASE CHINKE CHI'OMORERO:

Chiyeetanaine enkoru y'omonyene ebibe chiareng'anigwe na obwanchani bwa Nyasae buna boetanaine omnyabibe. Nyasae taganeti amakweri 'omonyabibe, korende aorokie ebibe biaye na abe moyo. Yeso igo achete gotooria abanyene ebibe. Nobe omogooko omonge Igoro ase engencho y'omonyabibe oyomo oonchokire. Nyasae igo aganetie ayesibie enkoru ase amanyinga 'Omwana oye Omomoma, nere Yeso Kristo. Chinsase echio chiagwekanigwe na amanyinga a Yeso boigo. Obwanchani bwa Nyasae igo bokogania bosoe enkoru enkendu ekwete.

Yeso igo agotenena gesieri ase enkoru oyetura. Oise komoigorera, nabo arasoe, naende ayesibie enkoru yao ebe na obosibore.

ENKORO ERE YANACHEIRWE EKINA NA EKWAMA



OMOGWEKANO O KABERE

Omogwekano oyio igo okworokia omonto ochaakire koonchoka na komorigia Nyasae. Omomaleika obogoirie omocro, noro Ring'ana ria Nyasae, erire moyc. na rire ne chinguru, na rire na obwoqe kobua omoooro onde bwonsi

cre na obwoye chinsémo chionsi, naende igo rigosamba riatanana nonya nomoyo na omoika, na ebimo na emeseto ere ime yabo, naende igo rire eriango kobimanya ebirengererio bi'enkoró. Abaibirania 4:12. Ring'ana ria Nyasae rimoinyoria oyio ng'a eng'eeria y'ebibe namakweri. naende omonto obeekeirwe gokwa ara rimo rioka, na nyuma y'ogokwa ogokanerwa. Abaibirania 9:27. Egesibo ki'omonyene ebibe na ere oyotegeneti, nao keraabe ime y'ekebenberi ki'omoreró kegwoka na ekemore. Ase okoboko konde, igo abogoretie ekeore ki'omonto. Ring'ana erio nario rikomoinyoria omonyabibe ng'a intwe twensi ntogwenerete gokwa. Igo toyianchete mono emebere yaito, nonya nokoyerenda ase chianga na endaagera, naende koyeisaneria okogania kwaye. Omobere igo oraakwe na ogunde. Amakonde nayorie omobere ekero omoika okoorokigwa ase obosio bw'ekeró ki'ogokanerwa kia Nyasae. Omonyabibe ochaakire koriigwa Ring'ana ria Nyasae rikomokurera, na oyeigoire enkoró yaye ase obwanchani bwa Nyasae. Omoika Omochenu ochaakire koraba ase enkoró y'omosunte. Oborabu bwa Nyasae ngosoa bore na bwachaakire goseria omosunte bwonsi. Aase oborabu bore, cmosunte igo ogotama. Obwanchani bwa Nyasae obuya, bwachaakire koyebookia enkoró enkendu. Ebibe biagwekanigwe ching'iti ao ao, ngotama bire.

Aye omonyabibe, omwanche Yeso ore oborabu bw'ense asoe ime y'enkoró yao, erio omosunte amo na ogokora kw'omosunte nakorwe enkoró ime buna kwarora-ase omogwekano. Yeso agateeba: Inche ninche oborabu bw'ense, ere oyoraantunyane tagosoa omosunte ime nonya ng'ake. Yohana 8:12 Obobe igoro yabo abanchete omosunte kobua oborabu. Yeso ekero asoete hekalu ya Yerusalemu akabaseeria bonsi abare koonchoreria, okoboora: Enyomba yane nerokwe enyomba y'ogosaba, Inee, inwe mwayekorire koba ribwago ri'abauuri. Mathayo 21:12,13. Enyomba nenkoró yao. Yeso tachete atwabere ebibe biaito bioka; korende agacha gotobooria na gotokora abasibore korwa ase chinguru chi'ebibe na obogambi bw'ebibe boigo. Ase ayio, Omwana (Yeso) karaabasibore, mobe na obosibore ekeene ekeene. Yohana 8:36.

ENKORO YAOROKIRIE EBIBE



OMOGWEKANO O GATATO

Aiga igo tokoyerora enkoro y'omonyabibe oyoorokirie ebibe biaye ekeene. Oiguure na ororire oborito bw'ebibe biaye ebinge, ase engencho y'ebio Yeso agachandwa omosalaba igoro. Enkoro y'oyio omonyabibe ebuneka ekeru akoyorigereria omosalaba oyo, omomalaika ore Ring'ana ria Nyasae, akomomanorera. Obwanchani bwa Nyasae bwarorekanete ase Yeso Kristo bwaichanirie enko-

ro yaye, anene ekero akoinyora ng'a Yeso Kristo, Emanwa y'Eng'ondi ya Nyasae, ochire kobirusia ebibe biaye ebingeré, akaba ogwancha akwe igoro y'omosalaba ase engencho yaye. Ring'ana ri'oboene ng'a Yeso akaakwa emecharichi, akabeekerwa egutwa y'amagwa, akaakerwa emesumari amaboko na amagoro, akaanekerwa omosalaba ase engencho y'ebibe biaito, erio nario rikobuna enkoro y'omonyabibe oorokirie. Kagosoma ring'ana ria Nyasae na koriigwa, nigo akwerora omonyene ase ekerore kia Nyasae, naende igo akomanya buya buna enkoro yaye ere ime y'omosunte na ebibe. Ebio igo bigosamba enkoro yaye na omoika ore na omoichano omokora arere ase ebibe biaye na Nyasae omoika ang'e. Obwanchani bwa Nyasae na omorembe oye osoa ime y'enkoro yaye, yasibetigwe na amanyinga a Yeso Kristo erio ebibe bionsi biruusigwe. Ochaaka komanya ng'a Nyasae nao are ang'e na ababunekire chinkoro, na aboororobirie omoika obatooria. Amateera 34:18. Obagwenia aboororobirie chinkoro, na koyagwenia amaote abo. Amateera 147:3. Naende ring'ana ria Nyasae riteeba: Omonto oyoiga nere ndaarigererie, omonto ore na enkoro yoororobire, oria ogotengechigwa gakoigwa ring'ana riane. Isaya 66:2.

Omoika Omochenu na obwanchani bwa Nyasae igo bokoyetaarera enkoro yasibigwe. Gakoyorigereria Omosalaba ase obwegeni, na gakoyarigereria amanyinga a Yeso, ayaitetege kobirusia ebibe biaito, omonto oyio ochaaka komanya ng'a ebibe biaye biabeirwe. Bono onyoora oboronge enkoro yaye ime ng'a amanyinga aye Yeso, Omwana O Nyasae, amosibirie ebibe bionsi. 1 Yohana 1:7. Ere oyokomwegena Yeso tagosira, korende nigo akoba na obogima bwa kare na kare. (Soma 1 Abakorintho 6:10,11.) Ase Yeso ntore na okoboorigwa ase amanyinga aye, okwaberwa kw'ebibe, koreng'ana na obonge bw'ogosesenigwa kwaye. Abaefeso 1:7. Bono, nare na omoika omoyia ime y'enkoro yaye na korwa agwo, tayiancheti ense gose ebinto bi'ense, korende ogania ebinto bia Nyasae oyomoichoreirie enkoro yaye na obwanchani bwaye. Ching'iti, engencho yaye ebibe biaye nao chire isiko y'enkoro yaye, nonya Saitani bweka omonyene tancheti kogenda,

OKOBAMBWA AMO NA KRISTO

Kobambwa
amo na Ere
Abagal. 2:20

Gokwa ase ebibe
na koba moyo
ase Nyasae ime
y'Omonene oito
Yeso Kristo.
Abarumi 6:11



naende nabo akonakorigereria nyuma, aganetie naende anyoore egesero. Ase ayio, twateebigwe torende na gosaba, na tomwange Saitani na ere natotame.

OMOGWEKANO O KANE

Omogwekano oyio ogwekanigwe na Omokristo onyoorire omorembe kegima na okoboorigwa ase ekeng'wanso ki'Omonene oito na Omotooria Yeso Kristo. Ase igo tari

korora bonene bonde igoro ya kende gionsi, otaga omo-
salaba o Yeso Kristo, oyo ase ense eyio yabambirwe ase
are na ere ase ense yonsi. Abagalatia 6:14. Omanyire
buya ng'a Yeso agakwa igoro y'omosalaba erio tobe aba-
kuure ase ebibe, tobe moyo ase ay'ekeene. 1 Petero 2:24.
Omokristo obambirwe ase ense. Twachiikirwe togende
ase Omoika naende titogoikerania nonya ng'ake okogania
kw'omobere. Abagalatia 5:13-25. Naende twateebigwe
torigie na omokia obochenu, obwo omonto atanyaare ko-
morora Omonene atari nabwo. Abaibirania 12:14.

Ase enkoro ere ime y'omogwekano oyo, nonyaare
korora esiuro aase Yeso asibetwe na chingatara nyuma
y'okoruusigwa chianga chiaye. Nonyaare koyorora eme-
charichi eyebamoiterete bobbe, ase engencho y'egesusuro
nanga giatogwenerete intwe, gekamogwera ere. Isaya
53:11,12. Akaakwa ase engencho y'ebibe biaito. Omoruoti
Herode na abanto bakamochecheria nyuma y'okomoaaka
Yeso emecharichi, bakomoboyia eanga imbariri. Baka-
moroiseria egutwa y'amagwa bakayebeeka igoro y'omotwe
oye, ribaga ri'egutwa y'edhabu. Bakabeeka egetonto
ase okoboko kwaye gw'okerio ribaga ri'enyimbo y'omoru-
oti. Bagatung'ama ase obosio bwaye, bakamochecheria,
bagoteeba, Masoge, Omoruoti bw'Abayahudi! Erio ba-
kamotwera amate, bagakebogoria egetonto keria, baka-
moaaka-aaka omotwe. Nyuma y'okomochecheria, bakamo-
ira erio abambwe. Mbareo abange bakorokwa Abakristo na
barabwo nabo bagosaba ase ekanisa, na baika ase Emesa
y'Omonene, bamoteerera Nyasae amateera, korende ogo-
kora kwabo okobe igo gokomobamba naende Omotooria
obo. Tari bonsi bagosaba na goteeba Omonene, Omonene,
baraasoe oboruoti bwa Nyasae, korende nabagokora obwa-
nchani bw'Ise obo ore Igoro. Mathayo 7:21-27. Nonyaare
koyorora omouko bwe chibeesa ase Yeso, ase omogwekano.
Yuda akamorua Yeso akamoonia ase ebing'ese emerongo
etato bie chibeesa ekiaagera obwanchi bwe chibeesa
mbwamoribetie amaiso, naende bokamobwata enkoro yaye
embe. Ekemore (etaya) ne chingatara, na ebinde, nabio
abasigari bakorerete emeremo ekero bare gokora obomera
igoro ye chianga chiaye, ase okoriikerania Ring'ana ria

Nyasae buna riabanetwe: “Ngwatanana bare chianga chiane, na engobo yane nkoyekorera bare obomera.” Amateera 22:18.

Ase ritimo omorendi akamobeta rikere na enkoro, na engaki eyio akarwa amanyinga na amaache. Yohana 19:33-37. Ekero etwoni etaraagweya, Petero akamokaana Yeso ase obosio bw’omwana omoiseke omosomba. Inee! Kwamwanchire Yeso ase ring’ana na ogokora? Gose nkwaikire gokora bo? Yeso agateeba: Bono, monto onde bwensi oraankane ase obosio bw’abanto, na inche nabo ndaamokaane ase obosio bwa Taata one ore Igoro. Mathayo 10:32,33. Naende Yeso agateeba: Monto onde bwensi karaaganie kombwatia, na ere ekaane omonyene, abogorie omosalaba oye, ambwatie. Mathayo 16:24. Korende monto onde bwensi otabogoreti omosalaba oye antunyane, tangwenereti inche. Mathayo 10:38.

Egetare ki’emiaka, Ing’a ribaga nchiche;
‘Manyinga ng’itekera, Korwa ‘mobere oo;
Onsibie mbe ‘morabu, Nyimokie omwan’ oo.

OMOGWEKANO O GATAANO

Aiga tworokigwe obomoyo kwasibigwe bw’omonyene ebibe otoorekire ase okomentekana kw’amaabera. Obeire hekalu y’ekeene ya Nyasae, obomenyo bwa Nyasae Taata, na Omwana, na Omoika Omochenu, buna ateebete Yeso: Omonto karaanyanche naribwate ring’ana riane; naende Taata namwanche, na intwe natoche ase are, natokore obomenyo ase are. Yohana 14:23. Ase Yeso Kristo, Nyasae omosikire omonto, naende omosenirie, naende omomokirie. Luka 1:52.

Bono enkoro yabeire hekalu ya Nyasae ore moyo. Ebibe biaruusigwe. Ribaga rie ching’iti ao ao, chiare kogamberwa na Saitani, ise bw’oborimo, twayororire Omoika Omochenu omenyete ase enkoro. Ribaga ri’ogokora kw’amabe ‘omobere, enkoro yabeire buna omogondo bw’okwama, gose omote okwama amatunda. Ekwama ritunda ri’Omoika buna obwanchani, omogooko, omorembe, oboremberia, ogokora okuya, oboitongo, obwegenwa, obwo-rooro, ekerengo, na amatunda ande, ayamogwenerete Nyasae na mwanyabanto. Omonyene enkoro eyio obeire orosagia rw’ekeene, ri’okwama amatunda ase ritina

HEKALU YA NYASAE

Oboitongo
Obuya
Okwegena
Obwororo
Okwerita

Obwanchani
Omogooko
Omorembe
Oboremereria
Abagal. 5:22,23.



ri'ekeene, engencho yaye, Yeso Kristo Omonene oito. Yohana 15:1-10. Naende ogacha enkorō yaye Ring'ana ria Nyasae. Ekiaagera agoichorigwa na kobatiſwa na Omoika Omochenu, nare ne chinguru kobua omobere na okogania kwaye. Ase chinguru chi'Omoika Omochenu nanyaare kogenda ase Omoika. Takomenya naende ase biria arooche, gose akoigwa, korende igo akomenya na okwegena, ekiaagera okwegena nase Yeso Kristo, noko nakwo okubua kobuete ense. Omenye ase ogosemeria, na-

ende ogokong'igwa ase ogosemeria kw'ogocha kwaye Omonene oito Yeso Kristo. Omenya ase obwanchani bwa Nyasae bokomenya kare na kare.


Mbasesenirie abachenu chinkoro, ekiaagera barabwo nabamorore Nyasae. Mathayo 5:8. Omoruoti Daudi, nonya orenge omonda, na ababueete ababisa baye, agaita rimonto Goliato na abande, korende akaba na okogania okomo okonene. Ase enkoru akarera: Aye Nyasae, ontongere enkoru endabu; onkore omoyia omoika omotoereru ime yane. Amateera 51:10. Tari omonto oraanyaare gwe-sibia enkoru yaye gose gwetongera enkoru enyia. Nemo-gwenerete amochere Nyasae ase obokanyeku na kobitiga ebibe biaye buna Omoruoti Daudi akorete. Naende nemo-gwenerete abe buna omwana omosiru otigete chimbeche akairana ase ise agateeba: "Taata, namochire igoro ase eriooba na ase obosio bwao." Nyasae nigo are ang'e komokoonya kera omonyene ebibe okomochera ase omoika bw'obokanyeku. Nyasae agateeba: Na inche ninkoe enkoru enyia, na inche nimbeeke omoika omoyia ime yao, na inche ninyerusie enkoru enkong'u buna rigena ase omobere oo, na inche nimbeeke omoika one ime yao, erio ogende ase amachiiko ane. Eyio emuma enyia Nyasae akorete, akabeeka ekemanyererio ase amanyinga 'Omwana oye Yeso Kristo.

Ase omogwekano oyo, twarorire omomalaika oorokire naende. Abamalaika bakobakorera baria baraaboire obogima bwa kare na kare. Naende abaetanana baria bamosigete Omonene. Amateera 34:7; 91:11; Danieli 6:22; Mathayo 2:13, 19; 18:10; Ogokora kw'Abatomwa 5:19; 12:7-10. Saitani boigo arerekana ase omogwekano oyo, oteneine ang'e na enkoru, origereretie ribaga koirana naende ase obomenyo bwaye bwa kare. Ase igo twateebigwe: Mobe na ekerengo na korenda: ekiaagera omobasoeri oino Saitani, buna endo ekoruma na koetaetanana, ekorigia abanto ebamere. 1 Petero 5:8. Mwangwe Saitani na ere nabatame. Yakobo 4:7.

OMOGWEKANO O GATAANO NA RIMO

Omogwekano oyio noyo bw'omoichano bw'oyo oir-nire nyuma. Eriso erimo riachaakire koriba. Nigo okwo-rokia ng'a ochaakire gokenda na okobwatwa ne chitoro

ENKORO ETEEMIRE NA GWATANANWA



ase orogendo rwaye rw'Obokristo. Eriso rinde, ase obo-soku, ririgereretie ande onsi goteema aebererie ense. Oborabu bore ime enkoro bwachaakire korima . Tarigeti naende gochandwa amo na Kristo. Bono nigo are egati-gati y'amateemwa achaakire koyaancha ribaga ri'okomwanga Saitani. Nigo akomoigwera Saitani kobua komoigwera Nyasae. Nonya ore ogosangererekana emesangererekano y'ekanisa na ateema kobisa obwanchani bw'ense

bore ime y'enkoru yaye, bono bworoba ase Nyasae, na nde osiria obwanchani bwaye bwe ritang'ani ase Nyasae. Eng'enang'eni y'enkoru yaye, engencho yaye ebirengere-rio, yarima na omosalaba oba egurube endito. Ochaaka kworoba ase okwegena kwaye, agatiga koba na obomo na Nyasae ase ogosaba. Obeire omworo ase engencho y'e nkoru, akamo Saitani ribaga.

Omoika bw'obwerori (buna onchimbo) nkorigia ore aase 'ogosoera. Oyo oiranire nyuma obeire omwerori, bweba ng'a igo atooregete ase obuya bwoka. Ogotinda ngotura kore egesieri gokorigia aase kogosoera. Ande monto onde amoteema anywe amarwa. Amoteebia gaki kanywe make igo, korende tainyoreti okonywa amarwa make igo nigo enga entuboka ekoraa goika orooche rw'ogotinda. Ande omokungu okwengera omosaacha oye na abasaani baye amarwa, korende nigo akweabera ogoteeba ng'a ere omonyene tari konywa amarwa. Korende ere nigo akoraa abande banywe, naende igo akong'ainwa na omoika bw'ogotinda, na obotomani na gwancha gotaara amo rfa abasaani ababe kogenda ase okwegookia. Ande omonto amoteebia ng'a ogotenga na obokano buna Abasongo bagokora tari ebibe, korende ogotenga na obokano buna abatari abecheni nebibe. Tamanyeti ng'a, ande onsi aase bagotenga obokano nomong'uso bw'ebibe. Okonywa chisigara chie chituka mbobe buna okonywa, etumbato ase emechie. Yeso tanywete esigara nonya ng'ake, gose Mokristo onde ore komotunyana Yeso.

Saitani amoteebia ng'a tai gento gokora ebibe ase ritang'ani, gose gotomana rimo-rioka. Saitani amoteebia ayio goika bireecha bw'obotomani nigo akonyoora ribaga ase ogosoera ase enkoru yasibigwe oyebwata naende.

Omonto ase omogwekano, oyokobeta omoyio ase enkoru, ogwekanire na baria bagochecheria Obokristo ase amang'ana 'obogenki. Oyio omonyene enkoru takonyaara koremereria echeche y'abanto, anene baria abasaani baye. Amang'ana abo asamba enkoru yaye, korwa aroru obwanchani bwa Nyasae bwakendire, ere ochaaka kobairoka abanto kobua Nyasae. Naende ase engencho y'obwoba igoro y'ebirengere-rio bi'abanto, ere obeire omosomba o mwanabantu na oiranire nyuma.

Endamwamu na okogeecha biaoroka naende ase ekeru ki'emechando biagama ase enkoro yaye. Okoraama kwa-beeka riko ase emenwa eria are gokorera ase komotogia Nyasae na komosaba. Keraabe Ibilisi okonyaara konyoora egesoero gose egesieri egeke, nasoe, naende nagareyie egesoero erio ebibe binde bisoere.

Nobwango korua ribaga obwanchani bwe chibeesa gosoa ase enkoro otatiga togosike ogokurerwa kw'Omonene oito Yeso akwanete: Renda, mosabe; timocha gosoa ase amateemwa. Mathayo 26:41. Oyoreekage ng'a nate-nine na arigererie tagwa. 1 Abakorintho 10:12. Gaki, nigo etogwenerete kweboyia ebinto bionsi bi'esegi bia Nyasae, erio tonyaare kobua gotanga obong'ainereria bwa Saitani. Abaefeso 6:11-18.

OMOGWEKANO O GATAANO NA KABERE

Omogwekano oyio nigo okworokia engencho y'enkoro y'omonto oiranire nyuma, ekiaagera nyuma kaeirwe oborabu na gokeigwa ekeegwa kia igoro, na gokorwa oyo bw'obomo bw'Omoika Omochenu, ogwa. Naende yorokereria engencho y'omonto otaorogeti, nonya Enchili yamorareirie na komomanorera ase are, korende oyekoirire enkong'u enkoro yaye, akagenderera gokora ebibe.

Yeso, omonyene akorokereria engencho y'oyoiranire nyuma ekeru ateebete: Ekereecha ki'eubi kagekomorua omonto, igo gekoeta gati aase atari na amaache, gekorigia aase gegotimokera getanyooreti kiaboora, Ning'irane mwane aase narwete: goika ekeru aikire, akayerora yaabusirwe na koroisigwa. Erio kiagenda, kiareeta ebireecha bitaano na bibere binde ebire ebibe gokebua ekenyene, bigasoa na komenya aroro, na omonto oria engencho y'omoerio yaba embe kobua eye ritang'ani. Luka 11:24-27. Korende abeire ase bare koreng'ana na oria omoreng'anio bw'ekeene: esese yayairaneire amaroki aye, na embeche yasibigwe yairanire kwegaragara ase amariba. II Petero 2:22.

Amariiko ayio ayeorokirie engencho y'enkoro y'omonto oyio. Ebibe ase obong'ainereria bwaye bwonsi igo bogoccha komenya ase enkoro ime koyegambera. Nonya nobosio bwaye bworokereria ase ekerengo, obosareku bw'enkoro yaye. Yamogweneire Omoika Omochenu orwe

ENKORO YAIRANIRE NYUMA GOSE ENKONG'U



enkoro ekiaagera ebibe na Omoika Omoichenu tibikonyaara komenya amo. Oborabu na omosunte tibiri na obomo. Enkoro tekoba hekalu ya Nyasae ne rikuruma ria Saitani boigo. Yamogweneire omomalaika, engencho yaye Ring'ana ria Nyasae, asooke ase omoichano, nonya origerereti nyuma, oganetie ng'a omonyene enkoro aonchoke naende buna omwana omosiru ochia kwebooria enkoro yaye

ekero arenge oikaransete egati gati ye chimbeche, akaba oganetie kweigotia ase amasabo 'echimbeche chiare koria, monto tarengere ore komoa gento. Akainyora chingencho chiaye chi'okoirana nyuma nobosiru. Akaorokia akaboora: "Ninyimoke, ngende ase taata na komoteebia, Taata, namochire igoro ase eriooba na ase obosio bwao, tingwenereti ndokwe omwana oo naende." Ase engencho y'okoorokia kwaye gw'ekeene na omoichano ase ebibe biaye, ise akamwabera, akamonyenyera emoori, akamoirania.

Korende ase omogwekano oyio, moika toiyo bw'okoorokia, komokoonya airane ase Nyasae, gose kogwa ase amagoro a Yeso; gose komosorora erio anyoore okwaberwa na ogosibigwa. Ebirengererio biaye biasambirwe na omorero, bigakwa. Nare na amato akoigwa, korende takonyaara koigwa eriogi ria Nyasae naende. Nare na amaiso akorora, korende takonyaara korora eora y'amakweri nao agwo are ang'e kweruta ime. Tari na obosoku naende, gose koonchoka kogenderera maiso marore ase ebibe biaye. Saitani ochire kogambera enkoro yaye, nao aikaransete ase ekerogo kiaye ki'obonene buna omoruoti. Ande ase isiko igo are agwetogia ase okororekana okuya buna chimbeera chiaakirwe echokaa (rikoro), na chirochio isiko chirorekan ng'a nechingiya, korende ime nigo chiichire na amauga 'abakuure na eubi y'ebibe. Mat. 23:27. Ise bw'oborimo oairire a ase 'omoika bw'ekeene. Kera eng'iti, engencho yaye kera ekebe nkere na ekerecha kiaye ki'eubi, kemokoonye kogambera enkoro nonya nabo naisa gwancha kwebeeka obosibore korwa ase abachandi b'eubi, takonyaara, ekiaagera obeire omosomba obo. Bono onyoorire oboronge ase aria Nyasae akwanete ase Omotomwa Petero: Naki morooche? Tikemogwenereti egesuro kere ekenene kobua omonto oria omotachete Omwana o Nyasae, nakoyabara amanyinga 'Omwana O Nyasae koba egento kia bosa, na koyokorera Omoika bw'amaabera oboenenu? Abaibirania 10:29-31. II Petero 2:1-14.

Omosomi omwanchwa, onye enkoro yao yabeire na engencho enga iga buna eye omorere Nyasae ase enkoro yao yonsi. Ere nabue, naende nanche kogotooria, na gokwabera, na kogosibia korwa ase ebibe bionsi, koraache ase omoika bw'ekeene koorokia. Nanyaare naende kosisiba Ibilisi amo na omoganda oye, na komotuguta isiko

korwa ase enkoru yao, koraanche, Nyasae akore boigo. Oche buna omonyene obogeere (ukoma) omocherete Yeso okorera: Koraanche nonyaare gonsibia, na Yeso akaboora: Nindigetie, sibeka. Mariko 1:40-43. Korende koraagenderere gokora enkoru yao enkong'u, naende gwancha omosunte kobua oborabu, tikori gosemeria konde nonya ngokonywa ase ore, ekiaagera gwachoorire amakweri ribaga ri'obogima; omosunte ribaga ri'oborabu.

OMOGWEKANO O GATAANO NA GATATO

Aiga twarorire omonyene ebibe orange na enkoru enkong'u, naende oiranete nyuma. Omobere oye oichoirwe ne chindumo, na omoika oye oichoirwe na obwoba bw'amakweri. Amakweri (engencho yaye amauga onsi ay'e-chinengo chi'omobere) agaacha ase ekeru getamanyiri, nonya nokoganigwa. Obweyanchi bw'ebibe kwasookire ne ching'eeria chinene chi'ebibe chiagweneire chiakaanwe. Gochandeka gw'ekebemberi ki'omoreru kwabwatire omika oye bw'okogoswa. Nonya nabo oganetie gosaba, nigo aroche ng'a takonyaara koba na obomo na Nyasae. Aman'g'ana onsi 'abasaani baye b'ense takonyaara komokoonya ekiaagera tamogwenereti komoremia. Naende takonyaara gwetooria ase eniibo yaye eyesangereirie ase ogwancha gwe chibeesa, nonya nogokendia chindumo chiaye, nonya nkomenta obomoyo bwaye. Nonya nokomorengeria, Saitani tamoeti ribaga rinde rionsi. Kera egento anchete ase ense, kiarorekanire komochecheria, naende abatang'ani baye b'oborimo tibakonyaara komokoonya. Achaaka koinyora ng'a nering'ana ri'okoondokia ase okogwa ase amaboko a Nyasae ore moyo. Konya orengereirie koinyora oboronge obosio bwa Nyasae ekeru anyoorete oborwaire bw'ogokwa, korende, bono ororire ng'a onyoorirwe. Abanto abange bagakwa mobosokano batanyooreti ribaga ri'okomoriria Nyasae, ekeru banyoorete oborwaire bw'ogokwa. Ase ayio twateebigwe komorigia Omonene ekeru akonyoorekana. Ribaga ri'okoigwa Ring'ana ri'ogotooreka ria Nyasae, oyio omonyene ebibe ogochia gokwa, ere bwangete obuya na obwanchani bwa Nyasae ase orogendo rwaye, yamogweneire koigwa eriogi ri'omogambi oye rigokwana: "Karwe ase nde, oyoraagereretigwe,

OGOSAREKA KW'OMONYABIBE



genda ase omorero o kare na kare ogacheretwe Saitani na abamalaika baye.” Mathayo 25:41. Omonto nigo agache-
ire ogokwa ara rimo, nyuma y’ogokwa ekiina. Abaibirania 9:27.

OMOGWEKANO O KIANDA


Aiga twarorire omogwekano bw’Omokristo bw’ekee-
ne oremereirie na kobua amateemwa amatindi ’omobere

naya Ibilisi. Nigo agoteemwa chinseemo chionsi, korende oremereeria goika omoerio. Obeire na okobua gw'okobua ase Yeso Kristo na tachaagete okoamererania kw'Obokristo bwoka, korende aikerania okoamererania boigo, ase okomorigereria Yeso, ore Omonyene gochaakia na Omonyene goikerania okwegena gwaito. Abaibirania 12:1,2.

Saitani amo na emeganda yaye nigo akoetanana enkoro yegenete, ogoteema korigia ribaga ase agosoera, korende mbosa. Oboenenu, na obwanchani bwe chibeesa, na omoika bw'obotomani nigo bigotura. Ribaga ri'esese na engo, twarorire "Egoree na etigere" ekiaagera ekero ase ekero ebibe nigo bikweonchora koba omogwekano onde gose kweroka erieta rinde. Korende Omokristo ore ndete nigo akorora ebibe ase kera omogwekano, nonya bigocha ase erieta ri'edini, gose buna abamalaika b'oborabu. Ekiaagera Ring'ana ria Nyasae na Omoika bw'ekeen ore ime ase enkoro yaye, nigo okomora ase ekeene gionsi, naende omokoonya gwatanana obuya na obobe. Amo ne ching'iti na ebirecha ebibe, nonyaare korora omonto ogotengera obokano ase obosio bwaye na obwate egekombe ki'edivai, gose amarwa koboko kwaye, okomoteema Omokristo ase obweyanchi bw'ense eye, na ase ogotinda na ogotengera obokano, korende ebibe ebio tibikonyaara komoichania Omokristo bweyatananire, na otigire ebibe na obweyanchi bw'ense. Ase okorora amang'ana ayio, osukigwe ang'e na Nyasae. Omonto onde omobetire na akayio. Aya igo onsi asambire enkoro yaye; emerumi, na okong'acha, na esekererio, na okogoseria ayamocheire ase abategeneti na abakorokwa Abakristo korende barabwo taibo. Korende nigo bakweremia ase amang'ana a Yeso akwanete: "Mmosesenirie inwe ekero bakobarama na kobarosia, na kobateebera kera ring'ana ribe ase oborimo ase engencho yane. Gooka, na gocheenga: Ekiaagera eng'eria yaino nenene igoro." Mathayo 5:11,12.

Ebibe, na omobere noro nomonto omonyene, na Ibilisi; nigo bagoteema ase omokia kobaatanana Abakristo na obwanchani bwa Nyasae. Korende ase oboremu nanyaare gokwana: "Ning'o oraatwatanane na obwanchani bwa Kristo? Inee, nogochandwa, gose nobokong'u, gose nokorosigwa, gose nenchara, gose ngesobono, gose neme-

ENKORO ERE nOKOBUA



chando, gose nēmioro? Korende ase amang'ana ayio onsi twabuire, na mono kobua ase Ere otwanchete." Abarumi 8:35-39. Ase okweboyia ebinto bionsi bi'esegi bia Nyasae, nanyaare gotenena ase rituko ri'obobe, na ase chinguru chi'Omoika Omochenu obua ebibe bi'omobere na amatemwa amange onsi. Oinyora ng'a Kristo karaamenye enkoro yaye, Ere nare ne chinguru kobua Ibilisi na emeganda yaye, ekiaagera Ere oyore ime yaito, nare ne chinguru kobua echioria ore ase ense, engencho yaye

Saitani. Yeso Kristo namobuete Saitani, na ebibe, na amakweri, na ase Ere twakorirwe koba ababui kobua, natonyaare kobua na koyenyoora egutwa y'obonene.

Eng'enang'eni y'ebirengererio biaye, yabeire maiso marore naende yabeire ekobara. Enkoro yaye yaichoirwe na okwegena na Omoika Omochenu. Omomalaika bw'Omonene ore igoro yaye, igo akomoinyoria chiira chie rigori rinene chiria chiaruletwe ase baria babuete na koremereria goika omoerio. Okomanoka 2:7,11,17,26; 3:5,13,21.

Esaaero ye chibeesa yaasie igo ekworokia ng'a tari enkoro yaye yoka, korende chibeesa chiaye na bionsi ebiabwate biatananeirwe Nyasae. Ribaga ri'ogokorera bosa eng'eeria yaye ase obweyanchi bw'ebibe, nigo akobakoonya abataka, na komwatanera Nyasae enseemo ya ikomi ya bionsi ebia akonyoora na kobua ase ayio nigo akorwa ekeng'wanso kende buna araanyaare. Ase kera enchera nigo agochikorera chibeesa chiaye ase obonene bwa Nyasae, buna chiombe chikoa omonyene amabeere, omonto oyio nabo akomoa Nyasae ebinto biaye ase enkoro. Chigurube chi'emegati ne chinswe bioorokirie ng'a igo amenyete obomenyo obuya. Tari konywa alarwa nonya nedivai bibe endaagera yaye, nonya nokwebeeka riko ase okonywa amanyinga, nonya ne chinyama chi'ebinto bikwerete bioka, nonya nokonywa esigara ekiaagera nigo akoinyora ng'a omobere oye nanga noba omochenu botambe buna ore hekalu ya Nyasae. Enkoro yaye yabeire enyomba y'ogosaba, naende buna botambe, goika nonya ing'ana rinde rionsi, tari komocha kogenda ase emesangerererekano y'ekanisa. Igo anchete ogosaba kore ekanisa nonya nyomba mwaye. Ase obwegenwa nigo akobasangereria abenyomba yaye gosaba kera rituko, ekiaagera omanyire ng'a atasabeti Omokristo takonyaara koba moyo nigo araabe buna enswe etanyaare koba moyo etari ase amaache. Egetaabu giasie igo gekworokia ng'a Biblia, engencho yaye Ring'ana ria Nyasae, negetaabu giasie ase are, nakio ogosoma na korigarigia ase omokia. Biblia nekemore ki'amagoro aye, naende nomooro bw'okomobua lbilisi. Naende Biblia nomogati oye bw'enkoro akoyeraageria omoika oye kera rituko, naende namaache aye agokendia erang'o yaye. Ekero ase ekero onyoora ogwesibia ase Ring'ana ria Nyasae, naende orikorera erio ribe eke-

rore gi'enkoru gi'okwerorera ime. Igo anchete kobogoria omosalaba ore okomoinyoria ng'a ere omonyene obambirwe amo na Kristo naende obookire ase oboyia bw'obogima, ase ayio nigo akorigia ayare igoro, aria a kare na kare, aria atari kororekana. Obeire ang'e kororana na Nyasae, naende obeire buna omote osimekire mbarabare ye chindooche, chi'amaache, igo okwama amatunda aye ase ekero kiaye, naende obeire buna orosagia rwe ritina ri'ekeene, narwo rokwama amatunda amange. Obwanchani bwa Nyasae bore oboikeranu, bwaichoire enkoroyaye, na ase ayio takoiroka amakweri. Amateera 1:1-3; Yohana 15:1-14; 1 Yohana 4:18-21.

OMOGWEKANO O IKOMI

Yeso agateeba: Inche ninche okwo okobookigwa, na obogima, ere oyonyegenire Inche, nonya okuure, nabe moyo, na ere kera oyore moyo na konyegena tagokwa nonya ng'ake goika kare na kare. Yohana 11:25,26. Ere oyokoigwa ring'ana riane, na komwegena Ere oyontomete, nare na obogima bwa kare na kare, nonya tagosoa ekiina, korende oetire korwa amakweri gosoa ase obogima. Yohana 5:24. Amakweri tari na obwoba nonya nege-susuro ase Omokristo, ekiaagera amakweri amerirwe ase okobua. Amakweri ng'ai okobua kwao kore? Amakweri ng'ai cbororo bwao bore? Korende Nyasae atogigwe ot-eire okobua ase Omonene oito Yeso Kristo. 1 Abakorintho 15:54-57.

Omonto omenyete ase Nyasae tairogeti amakweri. Okorwa gw'ense eye ekero keraaike, nagende bwoye ase omogocko ase enka eng'ikeranu ya kare na kare. Omotomwa Paulo agateeba: Nigo nganetie kogenda bwone imenye na Kristo, ekiaagera mbuya mono kobua. Abafilipi 1:23. Omokristo oganetie koborora obosio bwa Yeso, omokwerete ase omosalaba, na omoboretie ase amanyinga aye omonyene. Omoika Omoichenu okomoinyoria amang'ana a Yeso ekero ateebete: Timoichana ase chin-koro chiaino, momwegene Nyasae, na inche monyegene. Enyomba ya Taata nere na obomenyo obonge. Ninchiche naende mbaroisie aase nde, agwo aase nde inche, na inwe mobeo. Yohana 14:1-4. Eriso tiriayarooche, nonya nogo-to tikwayaigwete, nonya tasoete ase enkoru ya mwanyabanto amang'ana aya Nyasae abaroiseretie abamwanche-

OBONENE BW'OKOGENDA NKA



te. 1 Abakorintho 2:9. Monwa onde tori ense ogwenerete gotebereria nonya nokwoorokia obonene bw'aase a igoro aroiseretigwe ababui aiga ense na abamwengenire Yeso Kristo.

Ase omogwekano oyio o ikomi, twainyorigwe enge-ncho y'okogenda kwaye ase omwegeni bw'ekeene ime ya Kristo. Ribaga ria ise bw'amakweri, omomalaika o Nyasae ororekanire oganyete komoiraneria Nyasae omoika oyobareretwe oboronge. Omoyo na omoika biasiboirwe korwa ase omobere, biairirwe aase are oyomwanchete.

Okoroisigwa kw'omogooko nkomoganyete ase obosio bwa Nyasae. Omonene namoteebie: Mbuya, omosomba omuya na omwegeni, soa ase omogooko bw'Omonene oo. Mathayo 25:21. Saitani tari ne chinguru igoro yaye naende, ekiaagera nare ne rigori rinene ase amaiso 'Omonene amakweri 'abamosigete Nyasae. Amateera 116:15. Nkaigwa eriogi korwa igoro rigoteeba: Riika; Mbase-nirie abagokwa korwa bono: Naboigo, oteebire Omoika, banyoore ogotimoka nyuma y'emechando yabo; ekiaagera ogokwa kwabo nigo kobatunyaine. Okomanoka 14:13.

Omosomi omwanchwa ogosoma egataabu eke, Nyasae agokoonye omoe Yeso enkoro yao, ekiaagera ateeba: Omwana one, omoiseke one, ing'a enkoro yao. Toyea ribaga enkoro yao eng'ainererie enyaare kogosiria ase ogotunyana okogania kw'obobe, ekiaagera oyo okoyegania enkoro yaye nomoriri. Obitige ebibe biao obwatie oboronge, ekiaagera eng'eeria y'ebibe namakweri, korende ekeegwa kia Nyasae nobogima bwa kare na kare ase Yeso Kristo Omonene oito.

Naye kwamoete Nyasae obogima bwao, bwata ekio-rokererio ki'amang'ana ay'obogima, ase okwegena na obwanchani bore ase Kristo Yeso, ekiaagera kwamomanyire ere oyobwegenete, na gwancha ng'a nanyaare goke-renda keria kwagachete ase are goika amatuko aria. Eagaache igoro y'Okwegena kwaino kore Ogochenu mono, saba ase Omoika Omochenu, erende ase obwanchani bwa Nyasae, gokomorigereria Yeso, oyochaagete na oikeranirie okwegera gwaito, naende oyoraairane bwango, ore Omoruoti bw' Abaruoti.

Ere oraanyaare kobarenda inwe timogochwa, na kobatenenia ase obosio bw'obonene bwaye motari na ekemoa ase omogooko omonene, Ere ore Nyasae bweka, Omotooria oito ase Yeso Kristo Omonene oito, ase are obonene nobwaye, na obonguru, na okobua, ne chinguru ase Yeso Kristo, korwa kare, na bono, na goika kare na kare. Amina. Yuda 24,25.

Ogoteera toteere bono,
Buna 'twanchete ritang'ani;
As'amanyinga 'maya mono,
Ase Yeso okwete kare.

Toteere botambe,
Tobe n' omogooko Igoro.

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, tablettes, etc. de www.angp-hb.co.za ou comme une Application "Heart of Man" sur téléphones Android.

Este livro "O Coração do Homem" é obtido em mais de 538 línguas e dialetos falados em todo o mundo, a saber: (África, Ásia, América do Sul, Extremo Oriente, Europa, etc.). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratuitamente a literatura evangelica, livros e folhetos em mais de 538 lnguas diferentes escreva para:

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

info@angp.co.za

A Gospel Literature Mission financed by donations

Une Mission de litterature evangelique finacee de dons

Missao de literatura Evangelica financiada por donativos

(Reg. No. 1961/001798/08)